

NACRT

**ZAKON O DOPUNAMA ZAKONA O RASELJENIM LICIMA I POVRATNICIMA
U FEDERACIJI BOSNE I HERCEGOVINE I IZBJEGLICAMA
IZ BOSNE I HERCEGOVINE**

Sarajevo, januar 2025. godine

**RAZLOZI ZA DONOŠENJE
ZAKONA O DOPUNAMA ZAKONA O RASELJENIM LICIMA I POVRATNICIMA U
FEDERACIJI BOSNE I HERCEGOVINE I IZBJEGLICAMA IZ BOSNE I HERCEGOVINE PO
SKRAĆENOM POSTUPKU**

Donošenje zakona o dopunama Zakona o raseljenim licima i povratnicima u Federaciji Bosne i Hercegovine i izbjeglicama iz Bosne i Hercegovine predlaže se po skraćenoj proceduri usvajanja, budući da se ne radi o složenom i obimnom zakonu, odnosno da se u konkretnom radi o terminološkom preciziranju pojmova, proširenju postojećih prava na rekonstrukciju i izgradnju stambenih jedinica i na kategoriju mladih povratničkih porodica kojim bi se omogućilo da ostvare pravo na obnovu i rekonstrukciju stambenih objekata njihovih predaka, a koji su bili prinuđeni napustiti svoju imovinu a nisu obnovili stambeni objekat, što bi unaprijedilo povratak i ostanak mladih u Bosni i Hercegovini, te podsticanje saradnje sa iseljeništvom.

**ZAKON O DOPUNAMA ZAKONA
O RASELJENIM LICIMA I POVRATNICIMA U FEDERACIJI BOSNE I HERCEGOVINE I
IZBJEGLICAMA IZ BOSNE I HERCEGOVINE**

Član 1.

U Zakonu o raseljenim licima i povratnicima u Federaciji Bosne i Hercegovine i izbjeglicama iz Bosne i Hercegovine („Službene novine Federacije BiH“, broj: 15/05), iza člana 5. dodaje se novi član 5a. koji glasi:

„Mjesto povratka je jedinica lokalne samouprave na području koje je raseljeno lice, povratnik ili izbjeglica imala prebivalište 1991. godine.“

Član 2.

Iza člana 11. dodaje se novi član 11a. koji glasi:

„Član 11a.

- (1) Održivi povratak obuhvata programe ekonomskog osnaživanja povratnika, razvojne projekte podrške povratničkim sredinama, socijalne i humanitarne programe pomoći i druge vrste podrške reintegraciji povratnika u ranije prebivalište.
- (2) Vrste, obim i kriteriji programa održivosti povratka utvrđuju se planovima iz člana 37. tačka 1. alineje 1. i 2. ovog Zakona.“

Član 3.

U članu 27. iza stava (1) dodaju se novi stav (2) koji glasi:

- „(2) Izuzetno, pravo na dogradnju ili rekonstrukciju postojeće odnosno izgradnju nove stambene jedinice u mjestu povratka mogu ostvariti direktni potomci vlasnika iz 1991. godine, a što se dokazuje potvrdom o kretanju nadležnog organa u mjestu povratka.“

Dosadašnji stavovi (2) i (3), postaju stavovi (3) i (4).

Član 4.

U članu 37., tačka 2., iza alineje 7. dodaje se nova alineja 8., koja glasi:

„- ostvaruje i podstiče saradnju sa iseljeništvom;“

Dosadašnje alineje 8. i 9., postaju alineje 9. i 10.

Član 5.

U članu 40. iza riječi: „uvjeta za,“ dodaje se riječ: „održivi“.

Član 6.

Ovaj zakon stupa na snagu osmog dana od dana objavljivanja u „Službenim novinama Federacije BiH“.